

ALAHADY PAKA IV - TAONA D2019



« Izaho sy ny Ray dia iray ihany » (Jo. 10 : 30) »

Ry Kristianina havana, mbola ao anatin'ny Paka tokoa isika, Alahady faha-efatra amin'ny Paka izao.

Vakiteny I : Asa 13, 14. 43-52

Tononkira : Salamo 99

Vakiteny II : Apôk. 7, 9. 14b-17

Evanjely : Jo. 10, 27-30

Noraisintsika nandritra izany fankalazana izany hibanjinana ny toe-panahin'i Jesoa arak'ireo vakiteny aroson'ny Eglizy isaky ny Alahady mba hianarantsika ka hahatonga antsika ho mpanara-dia an'i Kristy tokoa izany hoe ho Kristianina. Ny Alahady voalohan'ny Paka dia nampianatra i Md Joany fa I Kristy no Vaovao Mahafaly

nandresy ny ratsy ka nitsangan-ko velona, na dia eo aza ny mety ho fisalasalana na onjam-piainana maro isankarazany dia nandresy i Kristy ka Izy mpandresy no banjinintsika. Raha miaraka amin'ny mpandresy isika dia ho mpandresy ihany koa.

Ny Alahady faharoa kosa dia i Kristy mpandresy no Kristy mpamindra fo. Md Thomas izay tsy nanaiky nino raha tsy nifanaritava tamin'i Jesoa no anatra velona ho antsika. Hitantsika fa maro ny zavatra manahirana, ohatry ny lavitra izy nefa Ray be famindrampo ny Ray ary I Jesoa no endriky ny

famindrampon'Andriamanitra izay ankamafisin'i Papa Fransoa fa raha mamela heloka sy mamindra fo isika dia ho mpamafy fiadanana tokoa.

Ny Alahady fahatelo dia tsy mba Andriamanitra lavitra ny Andriamanintsika, tsy firehinkevitra ny Paka ankalazaintsika fa Andriamanitra eo anivontsika miara-dàlana amintsika sy mpiara-belona amintsika. Kristy velona tokoa eo anivontsika I Jesoa ka isika dia hirahina ho vavolombelona ho Kristy mpiara-belona amin'olona ka ho mpamafy fanantenana sy fiadanana miaraka amin'i Papa Fransoa sy Notre-Dame de la Route.

Amin'izao Alahady faha-efatra izao dia hibanjinantsika an'i Jesoa Mpiandry Ondry tsara ka hivavahantsika manokana ho an'ny fiantson'Andriamanitra indrindra ho an'ny voatokana sy ny pretra ary hivavaka manokana ho an'I Papa Fransoa izay hamangy antsika ka ho tahaka an'i Piera izy hankahery antsika. Halalinintsika ny finoantsika mba ho Kristianina mpiara-belona amin'olona tokoa isika ka ho mpamafy ny fiadanana sy ny fanantenana.

Ny toetran'i Kristy Mpiandry Ondry tsara no banjinintsika amin'izao Alahady izao ka hivavaka indrindra ho an'ny Papa fa indrindra izy ho avy hamangy antsika izao, ho an'ny eveka, ny pretra, ny inspektera, ny filohan'ny Eglizy sy ho an'izay manana andraikitra amin'ny Eglizy ary aza adino fa ny fototry ny Eglizy dia ny fianakaviana ka mivavaha ho an'ny fianakaviana sy ny vocation ho an'ny fanambadiana izay taninketsa ipoiran'ny vocation rehetra. Andro lehibe tokoa androany hivavahantsika ho an'ny vocation, Andriamanitra miantso, ianao mamaly ary rehefa mamaly ianao dia Andriamanitra miantso mandrotsaka fahasoavana izy ka ny fiainanao ampifanarahanao amin'ny antso izay valiana ka ny fiananao mamaly ny antso no mitonda ny fiadanana ao aminao ka mahatonga anao ho mpamafy hafaliana sy fanantenana amin'ireo manodidina.

Aiza no hahafahantsika mamaly an'izany rehetra izany?

Ampianarin'ny Eglizy isika androany fa ny Mpiandry Ondry tsara no modely ho antsika hiaina an'izany satria ny toetran'ny mpiandry ondry tsara dia ny fahafoizana izay fototry ny vocation. Mahafoy tena izany hoe misy ny "renoncement", io no hahazoantsika ny fiadanana, izany ny toetra voalohany. Mahafoy ny ainy ho antsika araka ny voalaza ao amin'ny Evanjely nosoratan'I Md Joany androany izay mitantara amintsika mikasika ny Mpiandry Ondry tsara araka ny fampianaran'I Jesoa, mahafoy tena, mahafoy ny ainy ho an'ny ondriny izy. Hahitana fiadanana izany. Tsy matahotra ny fahasahiranana rehetra izy fa vonona miatrika an'izany.

Ny toetra faharoa izay sarobidy dia izy mahalala ny ondriny satria mihaino ny ondriny, miresaka amin'ny ondriny izy. Izay koa no tsy maintsy ataon'ny mpiandry ondry tsara, afaka miara-dia amin'ny ondriny izy satria mahalala tsara ny ondriny ary ny ondriny mahalala ny feony. Ambaran'i Papa amin'ny teny frantsay hoe "pastorale synodale" izany hoe ny fitoriana dia ao anatin'ny fiarahan-dia ka raha miara-dia dia mihaino izay miara-dia aminao. Tahaka ny nataon'ireo mpianatra Emaosy izay azo lazaina fa mafimafy loha ihany tamin'izy tsy nanaiky izay nambaran'I Jesoa ka nahatonga an'I Jesoa nilaza ry adala sy votsa saina. Isika tsindraindrany amin'ny maha mpiandry ondry antsika koa sahirantsaina satria tsy tafita ny hafatra ampitaintsika, fantantsika fa eo koa ny ratsy. Ny tsara dia tadiavin'ny demony ho potehina mandrakariva. Misy fifandraisana tsara eo amin'ny ondry sy ny mpiandry ondry, izany no maha EOY antsika ka manorina ETA dia ilay tranoben'Andriamanitra ka mahatonga antsika ho taranaka mpanorina. Tsy tantin'ny ratsy izany ka manjary mifanaratsy na ny

ondry na ny mpiandry ondry ka mila fibebahana isanandro.

Izany koa no fampianarana amin'izao Alahady faha-4 izao, ny mpiandry ondry tsara tsy mihebohebo na mipoerapoera fa feno fanentrentena satria mpanompo izy.

Feno fahatsorana sy fahamarinana, izany no toetra fahatelo amin'ny maha mpiandry ondry tsara ka aoka amin'izao Alahady faha-efatra izay hivavahantsika manokana ho an'ny mpiandry ondry tsara izao, enga anie ireo toetra maro ananan'ny mpiandry ondry mba hananan'izy ireo : ny fahafoizana, ny fahaizana mihaino ka hahalala ny ondriny ary aoka ny mpiandry ondry ho vonona hanompo sy feno fanentrentena, fahamarinana sy fahatsorana ka vonona mandrakariva hanatanteraka ny sitrapon'Andriamanitra.

Ny fampianarana farany dia izay voalazan'I Md Joany "Hanahaka azy satria hahita azy araky ny tena toetrany" izany no angatahintsika amin'Andriamanitra amin'izao Alahady faha 4 fankalazana ny Paka izao.

I Jesoa mpiandry ondry tsara no modely ho antsika ka enga anie izy handrotsaka mandrakariva ny fahasoavany amintsika ka haka tahaka azy isika, hivavaka ho an'ny Papa izay ho tonga hamangy antsika, hivavaka ho an'ny eveka ny pretra mba ho tena mpiandry ondry tsara tahaka an'I Kristy izy ireo, hahalala ny ondriny sy ho fantatry ny ondriny.

Ry mpiandry ondry tsara ô, ianao no mpiandraikitra ny olombelona rehetra, omeo mpitondra hendry sy mahafoy tena izao tontolo izao indrindra ny eto amin'ny nosinay, omeo mpiandry ondry mahiratra sy mahery fo ny Eglizinao amin'izao fotoana sarotra lalovanay izao, arotsahy aminay mandrakariva ny fahasoavanao mba ho Eglizy Olona Velona manorina ETA Eglizy Tranon'Andriamanitra mba ho génération mpanorina tokoa izahay ka ho mpamafy fanantenana sy fiadanana eo anivon'ny mpiara-belona aminay hahatonga anay koa ho tena mpianatrao. Amen

Mompera Arseveka Benjamin Ramaroson